

第一名

陳志寧

椰仔樹个天頂

得獎感言

感謝評審老師對我的作品的肯定，也感謝主辦單位提供這個機會讓我的作品可以發表。我還要感謝我的家人給我的支持，讓我在創作的過程中可以專心的寫作。更感謝生命過程中所經歷過的所有人、事、物，這些種種經驗充滿了喜、怒、哀、樂，不管是不是我喜歡，至少它們都豐富了我的生命，滋潤了我的創作，這些更是我創作的泉源。寫作的路上，期待我自己能夠堅持下去，繼續寫作出吸引人的作品分享給大家。



椰仔樹个天頂

一九八〇年个南臺灣，臨天光个風涼沁沁仔吹等。

又係一個好天時个寮日，昨暗晡讀書到半夜正睡个振遠聽著厥爸準備傢啦伙俚¹个聲，還在半睡半醒个目絲絲仔。

「好跣地，面洗洗啊！去灶下食一下朝。」厥爸對等振遠吩咐等。

都還無分佢恁清楚今晡日係禮拜幾，厥爸又續等仔講：「食飽就好同佢共下來去摘椰仔，今晡日愛去山頂假黎阿婆該仔。」

話講煞，厥爸跣等就行到厥眠床前同厥被骨掀起來：「同佢搨解索仔乜好，你係有書愛看，帶等來去，解索仔毋使幾多時間。」

振遠看著厥爸人都行上前來同被骨掀開來地，哪敢再韌床？佢一下仔就恁起還讀國中該下，有一擺厥爸乜係喊佢搨手做事。佢就淨過慢一息下眠床，盲知厥爸無幾久就帶等皮帶來，半句話都無再講，直接就拌皮帶下去，還譴告仔講：「喊地還毋跣，毋搨做事，無做有好嘖麼²？」

對該擺開始，佢就學精³地！大人儕喊地就黏時愛停動正毋會賺肉痛。

佢哪有麼个食？就單淨啖一口白湯茶就跣上車。上車前佢對書架仔項抽出數學課本，這擺考試个範圍係佢最有興趣个三角函數。佢透過這功課，正發現原來角度三十度同六十度對射出去个東西來講，飛地跌下來个距離平遠，差別就在一個飛過低，一個過高。仰會有恁生趣个事情，佢讀等書三不

時都會讀到添放核時間。毋過，噩夜讀書有時節對後生人來講不見得係無相關个。

等佢對恸想功課个興頭轉醒過來該下，厥爸早就同車仔駛到假黎阿婆屋面前。屋簷下放等半布袋个土番樣，該係假黎阿婆見擺係佢等來摘椰仔都會準備分佢兩子爺帶歸屋下个。

假黎阿婆送个番樣還救過佢，原來該擺莊項有一個老伯婆賴佢做賊，講振遠偷摘厥番樣，實在就冤枉正得。原來係老伯婆看著有細人仔偷摘厥番樣，佢無看真係麼人，就淨憑著个衫褲同背影，惡蹶蹶仔就直直去到振遠屋下投厥姆。好得厥姆用屋下布袋裡背个番樣先解釋，強調自家个細人仔無恁賤，屋下有好食，毋會去同人偷摘。係講啊偷摘其它个果子，無定著佢還會相信，番樣就無可能啦！下後，有捉著偷摘个細猴仔⁴，係無！等振遠厥爸歸來嘎就毋係恁仔講。

看著該兜番樣，振遠想拈一兩粒來食。佢正尋好所在放好東西，厥爸就對樹頂項大嫲聲喊：「振遠啊！好同佢搨解索仔。」

佢聽著厥爸个聲說，就慣勢个走到樹底下，同嫲等椰仔杷⁵个索仔解開，好分厥爸抽上樹頂再放過另外一把⁶椰仔下來。等厥爸同椰仔放下來抑係在樹頂修杷該下，佢愛共快同歸杷椰仔修蒂，等修好蒂再同椰仔扞到車仔頂項。

係厥爸無喊佢，佢又同椰仔張好，振遠就利用這兜閒時間在樹底下複習等厥功課。這擺佢帶數學來，佢大約事仔在地泥項畫等三角个圖，心肝肚恸等計算个過程。一來無帶紙抑筆記簿來，二來厥爸隨時會喊佢搨手做事，哪有恁多心事好來詳細算出結果。佢記核核計算个過程，等歸到屋下正來好好

啊算過一遍。這種讀書个方式，佢對國中開始就恁仔，論起來也無耽誤著幾個時間。係會有麼个爭差，大概就像忒瘰，好得還後生啦！

一朝晨个事頭，臨晝仔兩子爺就拚核咁。愛歸屋該下，假黎阿婆還出來送佢等。振遠聽厥爸个吩咐，同幾下粒好看相个椰仔攞分阿婆，講啊：「vuvu⁷，這兜係阿爸講愛送你等食个。」

假黎阿婆等振遠囡好椰仔就拏等厥頭那：「蓋乖！愛記得同該兜番樣帶歸去食，還過，讀書毋好忒瘰，目愛睡足正好。」

等佢兩子爺在愛歸个路項，振遠正對布袋裡背拈出來一粒番樣，對番樣个屎脰尾嚙一細口，定定仔嘅番樣汁。講就晝仔，其實該正係厥早朝。

這種上課日讀書，放寮日同阿爸共下做事个生活，對振遠來講一息都毋會生疏。最起碼對佢來講，有書好讀，比起厥爸愛做粗事正有好畜屋下人，佢安慰个係自家有過自在。再講，這幾下年來，厥功課都還做得，高中雖然無考著第一志願，起碼還係有考著厥理想个學校。讀高中這兩年零來，雖然講無考過全班頭名，毋過最起碼有保持在前三名。

乜因為功課保持穩定，每一個教佢个先生都鼓勵佢愛保持下去，等高中畢業該下愛考大學，自家想讀个科系應該毋會有問題。還過，久久仔同厥爸共下去摘椰仔个時節，佢係有看著飛行機對天頂飛過去，佢總會恁想，自家有一日係毋係做得駛飛行機在天頂飛來飛去？

有一個寮日，厥爸又喊佢好準備搵手共下去做事，這擺振遠試測仔問：「佢做得毋愛去無？學校天光日愛考試，佢想留在屋下讀多一息書。」

厥爸聽著，黏時就大聲呵喝：「讀書？考頭名有賞金麼？還有，你毋使想愛讀大學，佢繳你毋起。」厥爸譴到緊顫个續等仔講：「佢十歲就同你舅公掌牛賺錢畜自家，你幾多歲吔？還讀書，讀屁卵啦！同佢學跋樹仔摘椰仔。該椰仔恁好價，還驚賺毋贏讀書吓？」

聽著厥爸訓示佢个話，振遠也毋知哪來个勇氣，佢正經个堵厥爸：「無錢！無錢！無錢！你淨會呻你無錢好繳佢讀大學！佢甘願做有口人家个狗仔，也毋想做若俵仔。你恁好跋椰仔樹，你去跋！佢正無愛，樹頂項無定著係若命。毋過，絕對毋係佢个，佢个在天頂。」

分細人仔堵嘴，振遠厥爸譴到手擎高高準備愛往下去⁸，好得厥姆手扳遽，抓等厥爸个手，目汁含等、用哀求个聲同厥爸講：「少講兩句啦，細人仔還毋懂事，佢會跔你去做事啦！」

毋知係厥爸自家有感覺著對俵仔講忒重个話抑係仰仔，這擺佢顛倒變柔柔仔个聲說同振遠講：「係有你搨手，佢就毋使見放一擺椰仔就上下一擺樹仔，會有過輕鬆，乜摘得過遽著。你係肯跔去就上車，佢做得等你。你係毋想跔，也毋怕。」

振遠哪還敢再應，佢恁起厥爸摘椰仔好得有佢搨解索仔，係無个話，厥爸正經係放下一把椰仔，人就愛跔等下來解索仔，等解好又再跋上去正有法度放第二把下來。還過，該一把椰仔十過公斤恁重。等一個園仔摘核，一車滿滿个椰仔最少乜有二百零公斤，該兜事頭一概都愛厥爸自家做。

係跔去做事就自家無好寮，讀書个環境抑方式同人過無相同僅只仔⁹，無麼个相關啦！佢安慰自家，就跔去好啦！莫分阿爸忒辛苦也係做子女个本份。

該擺仔做事，兩子爺毋知係有鬥搭抑係氣氛毋著，對頭到尾佢等一句話都無講。還係事頭做煞歸到屋下，振遠厥姆先開嘴安慰佢：「莫搵若爸，你係有才情考上大學，阿姆做牛都會繳你，毋使驚。」

該暗晡仔，佢讀等書，對窗門看等天頂个月光，心肚仔緊恤美國个太空人係仰仔飛上去月光个？搵等¹⁰月光，佢讀到伏在書桌項睡核地！

第二日天光，振遠嘅無赴著車枋去學校，等下一枋來，佢絕對會遲到。佢拜託阿姆打電話分厥班項个導師講睡過迄，佢今晡日會遲到。

厥姆電話正放啊核，厥爸看著振遠還在屋下，一下仔火氣上來就開嘴罵：「讀麼个書？愛考試地都還會宕睡，佢就看你做得考幾好个成績。」

振遠心肝肚都在惱自家會遲到地，這下又分厥爸罵，後生人个氣頭就愛上來該下，厥姆拍厥肩頭又拏等厥頭那講：「無事地啦！佢同若先生講好地，佢知你讀書煞猛，又愛逐火車通勤，有過食力一息，佢講佢會在校門口等你，毋使愁啦！若爸該火氣，你又毋係毋知，莫搵佢就好。等你放歸，阿姆煮好食个分你補補啊！」

去學校个下一枋車頂項，振遠緊恤這幾下日發生个事情，厥爸同佢講个話，一句一句就像針樣仔刺等厥心。好得去學校个路頭佢落熟，這日佢根本就毋知係仰仔來到學校个，厥心事一概放在厥爸對佢个話緒裡背。

本成係歸日仔課个，因為連兩日愛考試，故所變做兩日淨朝晨考試，下晝放棄分學生仔有時間好複習功課。

第一日考三科，國文、數學同物理，這三科對振遠來講都係簡單个，做得講就算考毋到滿分，乜接近滿分个程度。毋過，這幾下日个事情對佢來講係一個盡大个打擊，尤其係厥爸講咁，就算佢自家考上大學，屋下乜無才情繳分佢讀。講就阿姆有安慰佢，毋過阿姆同人做小工，安家都食力咁，愛哪來錢分佢讀大學。

佢緊惱，就將把考試紙頂項自家寫好个答案一概打XX，連下課轉擺都無麼个氣猛¹¹直接就伏在桌仔頂，係準¹²毋係尿出，無定著佢歸日仔人就黏在凳仔頂，毋會離開位仔。

該日考試核，佢歸到屋下看著眠床就揸在被骨裡背。佢惱起同學都望想再幾隻月就做得參加大學聯考，係有考上，日後就做得發揮自家个才能。

佢本成惱啊！屋下經濟苦，自家又對航空有興趣，尤其係駛飛行機抑係研究火箭方面，初下佢還去參加空軍官校个體檢。佢就盡單純个惱想，係考上官校飛行科，日後做得駛戰鬥機，乜算係在天頂發揮自家个興趣。盲知，厥體檢因為近視嘅無過，連報名都無資格。

這下好咁！空軍官校考毋得，厥屋下个情況又分佢無信心，故所佢覺得在考試紙頂項畫核答案還算小可事情。

該暗晡，先生打電話來厥屋下愛請厥爺哀去學校一轉。厥爸同厥姆乜搞毋清楚情況，第二日就拚對學校去尋導師。

第二日本係考試，毋過導師拿出昨晡日考試个試卷，還過今晡日第一節个卷仔分振遠个爺哀看。

「你等看，佢其實一開始所有个答案幾乎都有寫著。毋過，佢尾下又同答案一概都畫核。所有个先生都看得著佢原本寫个答案，大家毋了解个係佢毋知做麼个又同答案畫核。這表示佢曉得寫，毋過佢毋想愛這兜分數。」導師恁毋解个同振遠个爺哀講。

「唉！講來話緒就長，吾阿遠恁久心肚應該盡譴悶腸。」厥姆正想愛講，又撇頭看一下厥老公，到嘴脣个話又吞轉入肚。

經過同振遠个爺哀溝通過後，導師同振遠喊到辦公室：「佢同你講哦！細俵人，面對打擊係講見擺都係用這種方式來處理，事情根本都毋會有好解決。無相同个事，佢等就用無共樣个方式來面對，天下無麼个事情係解決毋得个。」

振遠壞勢个臥頭看咁一下先生，又頭磬磬仔半句話都無講。

「佢同各科先生參詳好咁，這擺就分你準六十分。毋過，你愛參加市長盃个科學競賽，就比數學同物理兩科。你還有一隻月个時間準備，佢同你報好名咁。這擺毋好再同答案亂畫核咁！」厥導師講等就拍一下振遠个肩頭，補充講：「係打頭名有賞金五萬，有錫人哦！還過，係得獎个話，參加聯考有加分，你好好啊拚一斗分大家看。」

這擺好得各科先生肯原諒，畀六十分正無落鼓¹³，分恁多先生照顧著，振遠恁啊自家仰恁慇？續下來个日仔，佢哪還敢再亂來，就準寮日厥爸喊佢去搨做事，佢乜恬恬仔跔等，想辦法尋時間來加強比賽个科目正係重點。

比賽个日仔來了，振遠早早就跣床準備好，哪敢再宕睡又來遲到。佢提早一枋車想早一息到比賽現場，哪知得佢去到車頭正發現，車枋因為附近个

平交道出事變啊慢分嚴重。

振遠共快用公用電話，打歸去分阿姆，問看啊有法度來車頭載佢直接去比賽無？

「佢哪有法度騎恁遠个引擎？」厥姆在電話另外一頭應佢。

「你等一下，莊頭个阿財哥堵好來，佢問佢看啊！」電話肚一下又變做無聲咗，無幾久又對電話該頭傳來厥姆个聲：「阿財哥會去車頭載你，你在該仔等就好，毋好亂走哦！」

電話掛核，振遠在車頭愁到佇毋著。一站仔時間過去，有一臺羣羣确确个引擎哺等煙來。

「好上來咗，佢直接載你來去比賽个所在，扳好哦。」阿財哥吩咐等。

振遠淨緊恁自家仰會恁衰，自家恁用心準備，想愛有好表現分先生佢等看。官知嘎堵著火車出事。歸路仔，佢無出聲，風咻咻滾對厥耳公脣過，就像佢讀書這幾下年个過程樣仔。

等佢等拚到比賽个所在，堵堵好開始比賽个鈴仔聲響咗，振遠背等書包走一路入，好得還在時間內，還做得參加，就係作答个時間少咗幾分鐘。

各點半鐘¹⁴个比賽，數學同物理个內容對振遠來講還做得。

第二日，等佢去學校該下，厥導師早在教室等等佢。

「還壁哦！第二名呢！破記錄地！你係佢等學校第一個在市長盃科學競賽得名個學生，學校同獎金補到同第一名平多，等下朝會該下，校長會喊你上臺領獎。」厥導師暢到嘴合毋拏，還講：「最重要个係你做得參加大學保送考試，就看若選擇愛讀哪？」

「嘎佢做得選中正理工學院無？」振遠細細聲問先生。

「做得啊！毋過，選擇讀軍校係講因為讀書个學書金，嘎先生勸話你，最好莫！因為……，好啦！先去集合，上臺去享受一下得名个光榮。」先生毋盼得个同振遠講，又代佢歡喜个看等佢去集合上臺領獎。

就在對未來有盡多个望想个日仔，畢業考跔等來地！毋過，振遠就將佢當做係聯考前个練習考，試看啊自家个能力到底有幾深？

考核畢業考，離畢業典禮還有論十日¹⁵，同學大家都在設計還有練習畢業典禮該日愛表演个節目內容，打早正來到教室个振遠，一個人恬靜靜仔坐在厥位仔項，佢目凝凝仔看等同學跳上跌落，自家心肝肚就像無麼个心情想愛行上前。佢就有一種蓋奇怪的感覺亞在心肚¹⁶，蓋像有麼个東西在牽等厥魂魄，這下个振遠哪有像前一駁仔贏著比賽得名个形仔，佢就像凹地風¹⁷个雞胥仔。

「人有哪毋堵好麼？」厥導師行入教室第一眼就看著振遠，關心个行前來問。

就像分人嚇著个樣仔，佢打忸¹⁸地一下，斡頭看厥先生：「佢做得請假歸屋下無？有哪毋堵好？佢乜講毋清楚，這下佢無麼个力頭同同學共下搞寮，做得分佢請假無？」

「好啊！反正考試都考核，就伸著畢業典禮，你係人毋鬆爽，做得請假歸去。好好啊休息，若重點係在暑假個大學聯考，該正係你目前愛面對個最大挑戰。」先生安慰佢講。

振遠背等書包，尋等來學校個路轉去屋下。等佢歸到，屋前屋背恬肅肅仔，連大門都無揸煞。

鄰舍個叔姆看著佢轉來，著驚一下就問振遠：「你逐歸來愛去看若爸麼？」

「看吾阿爸？佢毋係去做事吓？做麼个愛人看？」振遠抓無頭繩個應話。

「吓？你還毋知？若爸朝晨去摘椰仔，在樹頂頂分高壓電電著，今這下在醫院急救呢！」叔姆緊張個同振遠講大概個情況。

等佢拚到醫院，該兜先到個大人儕一概都聚擎在病房前。振遠想愛入去，就淨做得尖到門口，透過門頂個玻璃框仔看對裡背去。

佢看著自家個阿爸勾在眠床頂，就像佢在書項看過，人在阿姆肚屎裡背個形仔，腳彎曲搵等，雙手扞等厥腳，久久仔又會掣一下圓身。每日看等康健健個阿爸，正一轉眼就變做一個病人。

「仰會恁仔？做麼个會有高壓電？仰會電著？」千千萬萬個問號跔等就逐上厥心事。

「做麼个愛去劈該兜椰仔杷？」有大人儕問。

「莫去張佢毋係就好，就恁發脹正得。」有人接話講。

最尾下傳來一聲：「就係恁註死，還孤盲哪！仰會有一條高壓線對樹底下過？」

對對門門¹⁹過後，振遠正搞清楚，原來係厥爸上椰子樹摘好椰子，在修杷該下，本成一刀就劈得下个葉仔杷，哪知得恁衰！劈無斷个杷墜下去，揆著高壓電線，樹頂頂一下仔就跣電²⁰，振遠厥爸就恁仔分電電著。電著該下，厥爸毋知麼个原因就對樹頂頂跌下來，好得有跌下來正無電死。

厥姆看著振遠在門口就行前來摘等佢緊噉，佢同振遠揞在心肝前噉得仔講：「這下屋下大細項²¹，你都愛同佢揸孩正好，若爸毋知會變做仰仔，愛仰結煞正好？」

從細，屋下有麼个焦急个事，振遠從來毋識看過厥姆噉，這係第一擺。

過地一站仔，來邊厥爸个親戚朋友定定仔走核，厥姆同振遠講：「病院有恁多護士在這，你自家先歸屋下休息。萬一係有人來問，就講毋使來邊若爸。」

一暗晡在眠床項眨來眨去，振遠个心事就淨在厥爸身項，這下毋單只屋下生活个问题，另外一個係愛仰仔來同阿爸揸手復健，畀有好早一息恢復。

等天甫光，佢還恁想厥爸會來眠床前喊佢跣床揸做事。毋過，無幾久佢就歸到現實个生活，振遠同自家講：「阿姆這下就伸自家好靠地！屋下个事頭正經愛自家孩起來正著。」

佢先打電話同先生請幾日假，就淨講厥爸做事愛人搵手。先生乜因為佢日常表現規規矩矩，就無多問，淨提醒佢畢業典禮過後，下隻月就愛聯考咗，愛記得利用時間加減複習功課。

等處理好請假个事，佢拿等厥爸摘椰子个傢伙行到屋背个椰子樹下。就像厥爸个樣仔，佢同梯仔憑在椰子樹頂，乜將索仔挽在自家圓身，佢定定仔跋梯仔上去。離樹頂還有幾步腳，佢回想阿爸係仰仔上到樹頂个。尾下佢用一條布圈仔落等厥兩隻腳，兩隻手摘等樹仔，就像虐毛蟲樣仔，定定仔「趯」上去。

等佢上到樹頂，莫講佢曉得用索仔縳等椰子杷，就係連仰仔同椰子杷割下來，佢都做毋著。

振遠坐在樹頂，想起恁多年來阿爸个辛苦。過去个日仔，自家有幾多擺毋歡喜咗出去做事就來懊躁。還過，就算係自家有去搵手，該乜淨搵解索仔。係講自家有麼个委屈？嘎阿爸逐頭都愛跋恁高个椰子樹，該兜佢自家去學校讀書，淨阿爸一個人做事个日仔，佢係仰仔過个？還過，這下就無到三樓高个樹仔，佢都跋到像厥命樣仔，阿爸係仰仔个擔頭分佢有法度恁仔來賺錢？恁著這兜，振遠寒毛菇緊仃。

佢臥頭看一下天頂，日頭對葉仔个縫晟下來。佢看著有一臺飛行機拖等一條長長个尾在天頂飛，佢又恁起從細同鄰舍个朋友搞寮紙炮仔个事。

佢等還細時節會去伯公下，拈人唱喏打過个紙炮屑仔來搞，係有拈著無打過个，佢等會退火藥出來，再同火藥塞在原子筆桿。佢等想愛做像美國人登陸月球个火箭，毋過幾下擺都係失敗。下後兩個人搵古搵怪，改用細竹筒仔，正勉強有飛起來一息。

佢又慚起有一擺，佢兩儕偷拿屋下代工做電容个殼，先在底下用鐵釘仔釘一個細空，再同火藥塞疊²²，尾下用錫墜仔²³同空口塞等。過後放在破析个竹筒，再用火藥揸一條錫火个藥路。等佢等同藥路點著火無幾久，「砰」一聲，跔等个就係錫墜仔拖等一條白白个煙飛出去。

雖然該擺錫墜仔飛無遠，毋過該畫面就像這下佢對葉縫看著个飛行機樣仔。佢又慚起前一駁仔去參加科學競賽，物理科其中有一條題目係設計火箭飛向太空个路線設計。聽先生講，該題佢在所有个參賽者裡背，得著个分數係最高个。

學三角、學物理同數學，這兜敢毋係就係愛分佢去實現厥人生个理想？

毋過……，慚啊慚仔，振遠又轉到現實。佢係毋做？嘎屋下愛仰結煞？阿姆一個人挨个負擔又忒重。還有，再過來自家係考上大學，愛哪來錢讀書？慚著這兜，厥心事一下就冷核咗。

就恁仔，上毋多得樹仔來摘椰仔，也毋想愛再上樹仔。佢將就去醫院同阿姆搨掌阿爸，最起碼有好樣陣、有好輪調。

幾下日無看著振遠去學校个導師，背尾乜摸到醫院。佢看著振遠，同厥姆打過招呼、問清楚厥爸个情況，就對等振遠來講教：「你就想恁仔來放棄考大學？」先生敢一下大氣，續等仔講：「大人个事頭，大人做得想辦法來解決，若事頭係打拚考上一間好个大學，日後有好个生活。」

「毋過，這下吾爸……」振遠个話正到嘴脣。

厥導師就搶話講：「若爸無法度做事吔？這係暫時个，毋過係錯過後生時期，日後你想愛讀書，嘎就愛付出過大个辛苦。你這下都伸最尾一步腳，考上去，伸个问题都會有好解決。」

「有好解決？愛哪來錢？」振遠心肚有兜不服个訥講。

「成功大學同淡江大學个航空系都有國防獎學金，你係考得著前幾名，莫講讀書个學書金，就係生活費都有補助。就淨驚你考毋著。」先生譴譴个咄佢講，續等又補充：「你還有科學比賽个保送成績呢！該做得分你加分35%，無成佢教个學生在有恁好个條件會考輸人？」

續下來幾下日，振遠本本無去學校。一來無定著係佢幾下年來噩夜讀書，也有可能係心情一下仔放鬆，振遠發吔一場病。一開始人殯殯，好得有查出原因，經過厥姆照顧，厥該條命正有拈轉來。

再過來，佢利用自家圓身有過得，就同阿姆去拜託該擺載佢去參加比賽个阿財哥。其實阿財哥就單身哥一個人，該擺會恁堵好尋著佢去載，乜係因為佢來振遠屋下愛問厥爸有事頭好做無？

這擺無共樣吔，振遠个阿爸還在醫院治療。就算出院，乜愛一段盡長个時間來復健。厥爸自家種个，還有同別人購个椰子園，該幾下百頭个椰子樹，振遠佢兩子哀絕對無才情來收成。堵堵好，這阿財哥還算做得倚恃。佢唯一个缺點就係賺有幾尖錢所費就懶做，等無錢吔正會來搨做。

毋怕，這下有人好拜託，總比無人去做，分該兜園仔拋荒²⁴好。振遠該幾下日就帶等阿財哥去點厥爸所有个椰子園，乜聘好工錢還有係賣著好價數个食紅，連假黎阿婆該仔都交代到好勢好勢。

到咗畢業典禮該日，振遠還在屋下同厥姆搵手，去學校个車枋早過咗。厥姆突然間恹起自家个俵仔恹多日無去學校，學校敢毋係愛畢業典禮了？等佢問正，正知得就像這一日。

佢囑咗振遠，哪知得振遠嗰應佢：「高中个畢業典禮無要緊啦，未來佢還會有過高个典禮好參加。」振遠無要無緊个講。

「使毋得，該係一種對自家負責个表現，屋下今晡日無麼个事頭愛你放下畢業典禮。」厥姆提醒佢。

「來毋掣咗，火車早過咗。」

「過咗？嗰佢拜託阿財哥載你去學校，路項還做得提醒佢天光日愛做事。」厥姆吩咐等。

分阿姆囑咗，振遠共快著好學校个制服。佢分阿財哥載去學校，等佢等到典禮活動个禮堂該下，典禮開始个樂隊演奏聲在學校禮堂外背聽現現。

振遠走得仔入去禮堂，厥導師緊張个同佢講：「佢還覺得你無愛來參加畢業典禮咗，共快去若位仔坐好，等一下就愛頒獎咗。」

嘴項講這畢業禮無重要，毋過，在上臺領獎該下，振遠心肝肚係對自家盡有信心，同學乜代佢歡喜个心情。

等典禮結束，振遠拿等畢業證書同獎品行出會場。厥導師送分佢一紮用日頭花搭等幾蕊細喇叭花做个花紮²⁵，勉勵佢千萬毋好因為一時个毋順序就來放棄自家个未來，愛好好啊打拚。

振遠高中三年好得厥導師惜佢，見係有毋堵好，佢就特別照顧這遠來愛每日坐火車通勤个學生。振遠在功課項同行為表現乜無分先生漏氣，就係幾擺个家庭出況狀害先生愁，毋過盡做得个係先生鼓勵咗，佢就聽得入。

「人窮志不窮，蝸蛇脫殼變成龍。」振遠同先生講：「這三年好得有先生恁惜佢，佢知得日後自家定著愛煞猛打拚，毋好再分先生愁。續下來个大學聯考，佢定著會盡自家最大个能力來得著好个成績，等放榜該下，佢再轉來學校同先生分享好消息。」

厥導師乜暢暢仔同佢約好，等放榜正來請佢食好料。

毋幾久，大學聯考就上場咗。再過個過月聯考放榜，總分七百分，振遠考試个成績再加科學競賽个加分，佢幾乎得著滿分。佢暢到共快聯絡厥導師愛分享這個好消息。

隔日，佢等師生兩個人約好在學校對面个食堂見面，先生請振遠食佢好食个炕肉大餐。食等大餐，先生除了鼓勵振遠去挑戰未來，乜鼓勵佢愛盡量去實現自家个興趣正好。

「若成績恁好，做得去讀電機抑醫科呢！」先生暢暢仔同佢講。

「醫科，佢毋敢想！毋過，佢想讀師範，像先生恁仔，日後做得教書做先生。」振遠頭磬磬仔毋敢看先生个講等。

「像佢教書做先生？你有考慮清楚無？若興趣毋係想愛駛飛行機、射火箭、上太空吓？」先生看等振遠，提醒佢。

「毋過，……。」

「毋過麼个？佢同你講過，係為著學書金來放棄自家个理想同興趣，嘎日後你會每日後悔个過日仔。」先生用決截个口氣同振遠講：「係毋考慮醫科，若分數做得登記著成功大學航太學系个國防獎學金生。去讀這個系，乜有獎學金好分你做所費生活。另外，讀書也毋使錢，日後畢業咁多得去中山科學院服務十年。」

「講係服務，乜係若興趣，就淨驚你表現毋好，時間到咁人家毋愛你，愛監你走，該正冤枉。」先生補充个吩咐。

「係噃？還有這個選擇个話，嘎佢就同佢寫做第一志願。」振遠聽著先生个建議，砒在厥心肝窟个石頭一下仔就放下來咁。

愛歸去該下，先生拿出一包紅包，交分振遠：「初初去讀大學定著會用著一息所費，這係你畢業前，佢同你搵申請个獎學金，還有學校先生大家一息个鼓勵。無蓋多，你拿好。」

振遠分先生這個大禮嚇著，毋知愛仰仔來應正好。

「你該得个，毋使細義啦！來，收好勢。」先生再一次堵分佢。

這時節，振遠愛噉愛噉个樣仔同先生講：「除了佢爺哀，你係牽成佢最大个恩人，你惜佢个恩情，佢將來愛仰仔正還得起？」

先生拍厥肩頭鼓勵个講：「同自家照顧好，好好啊打拚證明分先生看，分俚知得自家目水好，無看差人。還過，愛做一個對國家、社會有貢獻个人，佬仔大家就盡安慰地！」

十過年後。

有一日，振遠頭擺讀高中个教師辦公室，傳真機突然間響地，跔等就係傳真機「嘟嘟——嘟嘟——嘟嘟——」紙捲等出个聲音，頂項寫等一段文字：

「亮均先生同母校个先生大家好：

盡感謝母校先生个教導同相惜，俚係七十級个校友程振遠，俚有一個好消息愛同各位先生分享，請你等留意天光日个新聞報導。」

在文字个下背有搭一張相片，因為傳真機个關係，相片就像烏白影印个品質。毋過，對相片項還係看得出係一個細佬仔噏到開容笑面，厥手攏²⁶等一個火箭發射架仔，架仔項架等一粒長長、有人个兩三倍高，毋知係火箭抑飛彈个東西。

第二日暗晡夜个電視新聞有專題報導，在臺灣南部个九棚飛彈實驗基地，有飛彈試射成功个消息。對電視項看啊去，一粒拖等白煙个飛彈射向天頂，就一條白線透到天頂。該粒飛彈飛地盡高、盡高，一直到毋知幾高个天頂項！

記者緊報導等有關飛彈試射成功个新聞，曾經該在榔仔樹頂項看等天頂个後生仔又出現在新聞畫面中，佢噏到天轉笠嫲花个樣仔，厥面勢看起來盡有自信、盡有成就感。

註解

1. 傢啦伙俚：音ga' la' fo' sii；泛指各種工具。
2. 麼：音meˇ；「係毋係」的合音。
3. 學精：音hog jin'；學聰明了。
4. 細猴仔：音se heu' e'；對調皮的小孩子的戲稱。
5. 椰仔杷：音iai' e' pa'；整串椰仔的枝幹。
6. 一把：音id' pa'；一整串。
7. vuvu：排灣語；奶奶。
8. 往下去：音vong' ha' hi；往臉部扇巴掌。
9. 僅只仔：音giun' zii' e'；而已。
10. 搵等：音ten nen'；伴著。
11. 氣猛：音hi men'；精神氣力。
12. 係準：音he zun'；要不是。
13. 無落鼓：音mo' log gu'；沒有被當掉、留級。
14. 各點半鐘：音gog' diam' ban zung'；各需要一個半小時。
15. 論十日：音nun siib ngid'；大約十來天。
16. 亞在心肚：音ong' te' xim' du'；卡在心裡。
17. 凹咁風：音iab' e' fung'；洩了氣。
18. 打忸：音da' nug；受驚嚇而顫抖。
19. 對對門門：音di di deu deu；此處為將各方說法彙整起來之意。
20. 䟽電：音hong tien；導電了。
21. 大細項：音tai se hong；大小事情。
22. 塞疊：音sed' teb；塞滿。
23. 錫墜仔：音xiag' cui e'；錫製墜子。
24. 拋荒：音pau' fong'；任其荒蕪。
25. 花紮：音fa' zad'；花束。
26. 攙等：音cam' nen'；用手攙扶、身體靠著。